



Nunap immikkoortuini mittarfinnik tulleriiaarinissamut tunngavissat pillugit Inatsisartut aalajangiiffigisassaattut siunnersuut.

(ineqarnermut Attaveqaqatigiinnermullu Naalackersuisoq)
(Siullermeerneqarnera)

Demokraatit Naalackersuisut qutsavigerusuppaat nunap immikkoortuini mittarfinnik tulleriiaarinissamut tunngavissat pillugit siunnersuummut peqqissaartumik suliaqarsimanerannut.

Isertuussassaangilaq, Demokraatit pisarnertut uangalu nammineq ingammik ukiorpassuarni oqaluuseriuarsimagakku, Tasiilami mittarfimmik sanasoqarnissaa. Ukiorpassuannortut matuma siorna Assartuussinnermut isumalioqatigiissitap nalilerpaa, Tasiilami mittarfik inuiaqatigiinni aningaasaqarneq eqqarsaatigalugu imminut akilersinnaasoq. Maanna Naalackersuisut assiganik naliliipput. Tamanna Demokraatit nuannaarutigaa. Uangalu nuannaarutigaa. Tamanna kinguneqassammat, Nunatta Kangia tamarmi nunap sinneranut pitsaannerusumik atassuserneqassammat. Nunatta Kangianut angalaniarneq pisariinnerulissaaq ataatsimut isigalugu aamma akikinnerulissalluni.

Nunap immikkoortuini mittarfiit illoqarfanni inuussutissarsionermut aamma sunniuteqassapput. Qularutiginnilara, mittarfiit Nunatta Kangiani nunasinissamut pilerinarningortitsissasut, taamaalillunilu illoqarfanni suliffeqarfinnut piginnaaneqarluartunik sulisussaqaarniarnerup pitsaanerulernissaa.

Aamma puigussangilagut taakku isumaginninnikkut malitsissai. Ajoraluartumik Nunatta Kangiani isumaginninnikkut ajornartorsiuteqangaatsiarpoq soorlu assersuutigalugu meeqqanik sumiginnaanerit. Nunatta Kangia tikinnissaa ajornannginnerulerpat soorlu assersuutigalugu isumaginninnikkut suliaqarlutik angalasartuni assigisaannillu, sumiginnaanerit pitsaaliorniarneri akiorniarnelilu pisariinnerulissapput. Tamanna uatsinnut tamanut iluanaarutaassaaq annertoq.

Nunarput nunarsuullu sinnera maannakkorpiaq immikkut illuinnartumik inissisimavoq COVID-19 pissutigalugu. Demokraatilli isumaqanngillat, tamassuma nunap immikkoortuini mittarfinnik Tasiilami Ittoqqortoormiinilu sanaartornissaaq unitsittariaqaraa. Pilersaarutit imminut akilersinnaapput inuiaqatigiillu aningaasarsionerannut iluanaarutaassalluni. Taamatullu pingaartuuvoq, aningaasatigut ajornartoofimmi aningaasaliinissat aallartinnessaat, suliffissanik akileraarutigullu isertitanik qulakkeeqaatasussat.

Tamanna tunngavigalugu Demokraatinit ersarissumik inassutigerusupparput, nunap immikkoortuini mittarfinnik pilersaarutit Tasiilami Ittoqqortoormiinilu piaartumik aallartinneqassasut. Qularnanngitsumik Nunatta Kangiani innuttaasunut aammalu inuiaqatigiit aningaasarsionerannut iluanaarutaassaaq.

Nunap immikkoortuini mittarfinnik pilersaarutitut Qeqertarsuarimi, Qasigianguani, Kangaatsiami, Narsami Nanortalimmilu tunngatillugu, Naalackersuisut isumaqatigaavut, suliaq erngerluni aallartinneqassanngitsoq, taakku mittarfissat inuiaqatigiinni aningaasaqarniarnermut



iluanaarutaasusaa ngimmata. Kisiannili ima oqarnata, suliaq unitsilluinnarneqassasoq. Isumaqaatigaarput, pilersaarutit taakku assaartuussinermut ineriartortitsinermut pilersaarummut ataqaatigiittumik ivertinneqassapput. Nunap immikkoortuini mittarfinnik pilersaarutini Uummannami mittarfiliornissamut tunngatillugu, isumaqaatigaarput, pilersaarut unitsinneqassasoq, Uummannami mittarfiliornissaq teknikkikkut ajornarluinnarmat.

Taamatut oqaaseqarluta siunnersuut Sanaartornermut ataatsimiititaliamut suliassanngorlugu ingerlateqqipparput.